

世界名诗大系

王国维词二种

抚琴居制作



王
国
维
词
二
种

茗 华 词

如夢令

點滴空階，疏雨迢遞，巖城更鼓。睡淺夢初成，又被東風吹去。無據。無據。斜漢垂垂欲曙。

浣溪沙

路轉峰回出畫塘，一山楓葉背殘陽。看來渾不似秋光。隔座聽歌人似玉，六街歸騎月如霜。客中行樂只尋常。

臨江仙

過眼韶華何處也？蕭蕭又是秋聲。極天衰草暮雲平。斜陽漏處，一塔枕孤城。獨立荒寒誰語？驀回頭宮闕崢嶸。紅牆隔霧未分明。依依殘照，獨擁最高層。

浣溪沙

草偃雲低漸合圍，雕弓聲急馬如飛。笑呼從騎載禽歸。萬事不如身手好，一生須惜少年時。那能白首下書帷。

浣溪沙

霜落千林木葉丹，遠山如在有無間。經秋何事亦孱顏。且向田家拚泥飲，聊從卜肆憩征鞍。只應遊戲在塵寰。

好事近

夜起倚危樓，樓角玉繩低亞。唯有月明霜冷，浸萬家鴛瓦。人間何苦又悲秋，正是傷春罷。卻向春風亭畔，數梧桐葉下。

好事近

愁展翠羅衾，半是余溫半泪。不辨墜歡新恨，是
人間滋味。幾年相守鬱金堂，草草渾閑事。
獨向西風林下，望紅塵一騎。

采桑子

高城鼓動蘭釭炮，睡也還醒。醉也還醒。忽聽孤
鴻三兩聲。人生只似風前絮，歡也零星。悲
也零星。都作連江點點萍。

西河

垂楊里。蘭舟當日曾系。千帆過盡，只伊人不隨
書至。怪渠道著我儂心，一般思婦游子。昨
宵夢，分明記、幾回飛渡烟水。西風吹斷，伴燈
花、搖搖欲墜。宵深待到鳳凰山，聲聲啼 催起。
錦書宛在懷袖底。人迢迢、紫塞千里。算是不曾
相憶。倘有情早合歸來，休寄一紙，無聊相思字。

摸魚兒·秋柳

問斷腸、江南江北，年時如許春色。碧欄干外無邊柳，舞落遲遲紅日。沙岸直，又道是、連朝寒雨送行客。烟籠數驛，剩今日天涯，衰條折盡，月落曉風急。 金城路，多少人間行役。當年風度曾識。北征司馬今頭白，唯有攀條沾臆。君莫折，君不見、舞衣寸寸填溝洫。細腰誰惜？算只有多情，昏鴉點點，攢向斷枝立。

蝶戀花

誰道江南秋已盡，衰柳毵毵，尚弄鵝黃影。落日疏林光炯炯，不辭立盡西樓暝。 萬點栖鴉渾未定，潑灑金波，又霽青松頂。何處江南無此景，只愁沒個閑人領。

鷓鴣天

列炬歸來酒未醒，六街人靜馬蹄輕。月中薄霧漫漫白，橋外漁燈點點青。從醉里，憶平生。可憐心事太崢嶸。更堪此夜西樓夢，摘得星辰滿袖行。

萬頃蓬壺，夢中昨夜扁舟去。縈回島嶼，中有舟行路。波上樓臺，波底層層俯。何人住。斷崖如鋸，不見停橈處。

點絳脣

高峽流雲，人隨飛鳥穿雲去。數峰著雨。相對青無語。嶺上金光，嶺下蒼烟互。人間曙。疏林平楚。歷歷來時路。

踏莎行

絕頂無雲，昨宵有雨，我來此地聞天語。疏鐘暝
直亂峰回，孤僧曉度寒溪去。是處青山，前
生儔侶，招邀盡入閑庭戶。朝朝含笑復含顰，人
間相媚爭如許。

清平樂

櫻桃花底，相見頽雲髻。的的銀 無限意，消得
和衣濃睡。當時草草西窗，都成別后思量。
料得天涯異日，應思今夜淒涼。

浣溪沙

月底栖鴉當葉看，推窗跼跼墜枝間。霜高風定獨
憑欄。覓句心肝終復在，掩書涕洟苦無端。
可憐衣帶為誰寬。

青玉案

姑蘇臺上烏啼曙，剩霸業，今如許。醉后不堪仍
吊古。月中楊柳，水邊樓閣，猶自教歌舞。野
花開遍真娘墓，絕代紅顏委朝露。算是人生贏得
處。千秋詩料，一抔黃土，十里寒螿語。

滿庭芳

水抱孤城，雪開遠戍，垂柳點點栖鴉。晚潮初落，
殘日漾平沙。白鳥悠悠自去，汀州外，無限蒹葭。
西風起，飛花如雪，冉冉去帆斜。天涯。還
憶舊，香塵隨馬，明月窺車。漸秋風鏡里，暗換
年華。縱使長條無恙，重來處、攀折堪嗟。人何
許，朱樓一角，寂寞倚殘霞。

蝶戀花

閱盡天涯離別苦，不道歸來，零落花如許。花底
相看無一語，綠窗春與天俱暮。待把相思燈
下訴，一縷新歡，舊恨千千縷。最是人間留不住，
朱顏辭鏡花辭樹。

玉樓春

今年花事垂垂過，明歲花開應更**彈**。看花終古少年多，只恐少年非屬我。 勸君莫厭尊**疊**大，
醉倒且拚花底卧。君看今日樹頭花，不是去年枝上朵。

阮郎歸

女貞花白草迷離，江南梅雨時。陰陰簾**幙**萬家垂。
穿簾雙燕飛。 朱閣外，碧窗西。行人一舸歸。
清溪轉處柳陰低。當窗人畫眉。

浣溪沙

天末同雲黯四垂，先行孤雁逆風飛。江湖寥落爾安歸？ 陌上金丸看落羽，閨中素手試調醢。
今朝歡宴勝平時。

浣溪沙

山寺微茫背夕曛，鳥飛不到半山昏。上方孤磬定
行雲。 試上高峰窺皓月，偶開天眼覩紅塵。
可憐身是眼中人。

青玉案

江南秋色垂垂暮，算幽事，渾無數。日日滄浪亭
畔路。西風林下，夕陽水際，獨自尋詩去。 可
憐愁與閑俱赴。待把塵勞截愁住。燈影幢幢天欲
曙。閑中心事，忙中情味，并入西樓雨。

浣溪沙

昨夜新看北固山，今朝又上廣陵船。金焦在眼苦
難攀。 猛雨自隨汀雁落，濕雲常與暮鴉寒。
人天相對作愁顏。

鵲橋仙

沉沉戍鼓，蕭蕭廢馬，起視霜華滿地。猛然記得別伊時，正今日、郵亭天氣。北征車轍，南征歸夢，知是調停無計。人間事事不堪憑，但除卻、無憑兩字。

鵲橋仙

綉衾初展，銀釭旋剔，不盡燈前歡語。人間歲歲似今宵，便勝卻、貂蟬無數。霎時送遠，經年怨別，鏡里朱顏難駐。封侯覓得也尋常，何況是、封侯無據。

減字木蘭花

皋蘭被徑，月底欄干閑獨憑。修竹娟娟，風里時聞響佩環。驀然深省，起踏中庭千個影。依盡人間，一夢鈞天只惘然。

鷓鴣天

閣道風飄五丈旗，層樓突兀與雲齊。空余明月連錢列，不照紅葩倒井披。 頻摸索，且攀躋。千門萬戶是耶非。人間總是堪疑處，惟有茲疑不可疑。

浣溪沙

夜永衾寒夢不成，當軒減盡半天星。帶霜宮闕日初升。 客里歡娛和睡減，年來哀樂與詞增。更緣何物遣孤燈。

浣溪沙

畫舫離筵樂未停，瀟瀟暮雨闔閭城。那堪還向曲中聽。 只恨當時形影密，不關今日別離輕。夢回酒醒憶平生。

浣溪沙

才過茗溪又雲溪，短松疏竹媚朝輝。去年此際遠人歸。燒后更無千里草，霧中不隔萬家鷄。風光渾異去年時。

賀新郎

月落飛烏鵲。更聲聲、暗催殘歲，城頭寒柝。曾記年時游冶處，偏反一欄紅藥。和士女、盈盈歡謔。眼底春光何處也？只極度天野，燒明山郭，側身望，天地窄。遣愁何計頻商略。恨今宵、書城空擁，愁城難落。陋室風多青燈炮，中有千秋魂魄。似訴盡、人間紛濁。七尺微軀百年里，那能消、今古閑哀樂。與蝴蝶，遽然覺。

人月圓·梅

天公應自嫌寥落，隨意著幽花。月中霜里，數枝
臨水，水底橫斜。 蕭然四顧，疏林遠渚，寂
寞天涯。一聲鶴唳，殷勤喚起，大地清華。

卜算子·水仙

羅襪悄無塵，金屋渾難貯。月底溪邊一晌看，便
恐凌波去。 獨自惜幽芳，不敢矜遲暮。卻笑
孤山萬樹梅，狼藉花如許。

八聲甘州

直青山缺處是孤城，倒懸浸明湖。森千帆影里，
參差宮闕，風展旌旗。向晚棹聲漸急，蕭瑟雜菰
蒲。列炬巖城去，燈火千衢。 不道繁華如許，
又萬家爆竹，隔院笙竽。嘆沉沉人海，不與慰羈
孤。剩終朝襟裾相對，縱委蛇，人已厭狂疏。呼
燈且覓朱家去，痛飲屠蘇。

浣溪沙

曾識盧家玳瑁梁，覓巢新燕屢回翔。不堪重問鬱金堂。
今雨相看非舊雨，故鄉罕樂况他鄉。
人間何地著疏狂。

踏莎行·元夕

綽約衣裳，淒迷香麝，華燈素面光交射。天公倍放月嬋娟，
人間解與春游冶。烏鵲無聲，魚龍不夜，九衢忙殺閑車馬。
歸來落月挂西窗，鄰鷄四起蘭缸炮。

蝶戀花

急景流年真一箭，殘雪聲中，省識東風面。風里垂楊千萬綫，
昨宵染就鵝黃淺。又是廉纖春雨暗，倚遍危樓，高處人難見。
已恨平蕪隨雁遠，暝烟更界平蕪斷。

蝶戀花

空地重簾圍畫省，簾外紅牆，高與銀河并。開盡
隔牆桃與杏，人間望眼何由騁。舉首忽驚明月冷，
月里依稀，認得山河影。問取常娥渾未肯，
相攜素手層樓頂。

蝶戀花

獨向滄浪亭外路，六曲欄干，曲曲垂楊樹。展盡
鵝黃千萬縷，月中并作濛濛霧。一片流雲無
覓處。雲里疏星，不共雲流去。閉置小窗真自誤，
人間夜色還如許。

浣溪沙

舟逐清溪彎復彎。垂楊開處見青山。毵毵綠發覆
烟鬟。夾岸鶯花遲日里，歸船簫鼓夕陽間。
一生難得是清閑。

臨江仙

聞說金微郎戍處，昨宵夢向金微。不知今又過遼西。千屯沙上暗，萬騎月中嘶。郎似梅花儂似葉，**揭**來手撫空枝。可憐開謝不同時。漫言花落早，只是葉生遲。

南歌子

又是烏西匿，初看雁北翔。好與報檀郎：“春來宵漸短，莫思量。”

荷葉杯·戲效花間體

手把金尊酒滿，相勸。情極不能羞。乍調箏處又回眸。留摩留。留摩留。

矮紙數行草草，書到。總道苦相思。朱顏今日未
應非。歸摩歸。歸摩歸。

無賴燈花又結，照別。休作一生拚。明朝此際客
舟寒。歡摩歡。歡摩歡。

誰道閑愁如海，零碎。雨過一池漚。時時飛絮上
簾鉤。愁摩愁。愁摩愁。

昨夜綉衾孤擁，幽夢。一霎鈿車塵。道旁依約見
天人。真摩真。真摩真。

隱隱輕雷何處，將曙。隔牖見疏星。一庭芳樹亂
啼鶯。醒摩醒。醒摩醒。

蝶戀花

窈窕燕姬年十五，慣曳長裙，不作纖纖步。衆里
嫣然通一顧，人間顏色如塵土。 一樹亭亭花
乍吐。除卻天然，欲贈渾無語。當面吳娘夸善舞，
可憐總被腰肢誤。

玉樓春

西園花落深堪掃，過眼韶華真草草。開時寂寂尚
無人，今日偏嗔搖落早。 昨朝卻走西山道，
花事山中渾未了。數峰和雨對斜陽，十里杜鵑紅
似燒。

蝶戀花

辛苦錢唐江上水，日日西流，日日東海趨。兩岸
越山瀕洞里，可能消得英雄氣。 說與江潮應
不至，潮落潮生，幾換人間世。千載荒臺麋鹿死，
靈胥抱憤終何是。

蝶戀花

誰道江南春事了，廢苑朱藤，開盡無人到。高柳
數行臨古道，一藤紅遍千枝杪。 冉冉赤雲將
綠繞，回首林間，無限斜陽好。若是春歸歸合早，
余春只攬人懷抱。

水龍吟·楊花用章質夫蘇子瞻唱和韵

開時不與人看，如何一霎濛濛墜。日長無緒，回
廊小立，迷離情思。細雨池塘，斜陽院落，重門
深閉。正參差欲住，輕衫掠處，又特地，因風起。
花事闌珊到汝，更休尋、滿枝瓊綴。算來只合，
人間哀樂，者般零碎。一樣飄零，寧為塵土，勿
隨流水。怕盈盈一片春江，都貯得，離人泪。

點絳脣

暗里追涼，扁舟徑掠垂楊過。濕螢火大。一一風
前墜。 坐覺西南，紫電排雲破。巖城鎖。高

歌無和。萬舫沉沉卧。

蝶戀花

莫斗嬋娟弓樣月，只坐蛾眉，消得千謠詠。臂上
宮砂那不滅，古來積毀能銷骨。 手把齊紈相
訣絕，懶祝西風，再使人間熱。鏡里朱顏猶未歇，
不辭自媚朝和夕。

浣溪沙

七月西風動地吹，黃埃和葉滿城飛。征人一日換
緇衣。 金馬豈真堪避世？海鷗應是未忘機。
故人今有問歸期。

浣溪沙

城郭秋生一夜涼，獨騎瘦馬傍宮牆。參差霜闕帶
朝陽。 旋解凍痕生綠霧，倒涵高樹作金光。

人間夜色尚蒼蒼。

掃花游

疏林挂日，正霧淡烟收，蒼然平楚。繞林細路，聽沉沉落葉，玉驄踏去。背日丹楓，到眼秋光如許。正延伫。便一片飛來，說與遲暮。歡事難再溯。是載酒攜柑，舊曾游處。清歌未住。又黃鸝趁拍，飛花入俎。今日重來，除是斜暉如故。隱高樹。有寒鴉、相呼儔侶。

祝英臺近

月初殘，門小掩，看上大堤去。徒御喧闐，行子黯無語。為誰收拾離顏，一腔紅泪，待留向、孤衾偷注。馬蹄駐。但覺怨慕悲涼，條風過平楚。樹上啼鶻，又訴歲華暮。思量只有，人間年年征路。縱有恨，都無蹄處。

浣溪沙

乍向西郊斗草過，藥欄紅日尚婆娑。一春只遣睡消磨。
發為沉酣從委枕，臉緣微笑暫生渦。
這回好夢莫驚他。

虞美人

犀比六博消長晝，五白驚呼驟。不須辛苦問虧成。
一霎尊前了了見浮生。 笙歌散后人微倦，歸路風吹面。
西客落月蕩花枝。又是人間酒醒夢回時。

減字木蘭花

亂山四倚，人馬崎嶇行井底。路逐峰旋，斜日杏花明一山。
銷沉就里，終古興亡離別意。依舊年年，迤邐驟網度上關。

蝶戀花

連嶺去天知幾尺，嶺上秦關，關上元時闕。誰信
京華塵里容，獨來絕塞看明月。 如此高寒真
欲絕，眼底千山，一半溶溶白。小立西風吹素幘，
人間幾度生華發。

蝶戀花

簾 深深香霧重，四照朱顏，銀燭光浮動。一霎
新歡千萬種，人間今夜渾如夢。 小語燈前和
目送，密意芳心，不放羅幃空。看取博山閑裊鳳，
濛濛一氣雙烟共。

蝶戀花

手剔銀燈驚炷短，擁髻無言，脈脈生清怨。此恨
今宵爭得淺，思量舊日恩情遍。 月影移簾風
過院，待到歸來，傳盡中宮箭。故擁綉衾遮素面，
賺他醉里頻頻喚。

浣溪沙

似水輕紗不隔香，金波初轉小回廊。離離從菊已深黃。 盡撤華燈招素月，更緣人面發花光。人間何處有嚴霜。

蝶戀花

落日千山啼杜宇，送得歸人，不遣居人住。自是精魂先魄去，淒涼病榻無多語。 往事悠悠容細數。見說他生，又恐他生誤。縱使茲盟終不負，那時能記今生否。

菩薩蠻

高樓直挽銀河住，當時曾笑牽牛處。今夕渡河津，牽牛應笑人。 桐梢垂露腳，梢上驚鳥掠。燈焰不成青，綠窗紗半明。

應天長

紫騮卻照春波綠，波上蕩舟人似玉。似相知，羞相逐。一晌低頭猶送目。鬢雲欹，眉黛蹙。應恨這番匆促。惱一時心曲，手中雙槳速。

菩薩蠻

紅樓遙隔廉纖雨，沉沉暝色籠高樹。樹影到儂窗，君家燈火光。風枝和影弄，似妾西窗夢。夢醒即天涯，打窗聞落花。

菩薩蠻

玉盤寸斷葱芽嫩，鸞刀細割羊肩進。不敢厭腥臊，緣君親手調。紅爐頰素面，醉把貂裘緩。歸路有余狂，天街宵踏霜。

鷓鴣天

樓外秋千索尚懸，霜高素月慢流天。傾殘玉碗難成醉，滴盡銅壺不解眠。人寂寂，夜厭厭。北窗情味似枯禪。不緣此夜金閨夢，那信人間尚少年。

浣溪沙

花影閑窗壓幾重，連環新解玉玲瓏。日長無事等匆匆。靜聽斑駁深巷里，坐看飛鳥鏡屏中。乍梳雲髻那時松。

浣溪沙

愛棹扁舟傍岸行，紅妝素靨斗輕盈。臉邊舷外晚霞明。為惜花香停短棹，戲窺鬢影撥流萍。玉釵斜立小蜻蜓。

蝶戀花

憶挂孤帆東海畔，咫尺神山，海上年年見。幾度
天風吹棹轉，望中樓閣陰晴變。金闕荒涼瑤
草短，到得蓬萊，又值蓬萊淺。只恐飛塵滄海滿，
人間精衛知何限。

喜遷鶯

秋雨霽，晚烟拖，宮闕與雲摩。片雲流月入明河。
鵝鵲散金波。宜春院，披香殿，霧里梧桐一
片。華燈簇處動笙歌，復道屬車過。

蝶戀花

翠幙輕寒無著處，好夢初回，枕上惺忪語。殘夜
小樓渾欲曙，四山積雪明如許。莫遣良辰閑
過去，起瀾龍團，對雪烹肥。此景人間殊不負，
檐前凍雀還知否。

虞美人

金鞭珠彈嬉春日，門戶初相識。未能羞澀但嬌痴，
卻立風前散發襯凝脂。近來瞥見都無語，但
覺雙眉聚。不知何日始工愁，記取那回花下一低
頭。

齊天樂·蟋蟀用姜白石原韵

天涯已自悲秋極，何須更聞蟲語。乍響瑤階，旋
穿綉闥，更入畫屏深處。喁喁似語。有幾許哀絲，
佐伊機杼。一夜東堂，暗抽離恨萬千緒。空
庭相和秋雨。又南城罷柝，西院停杵。試問王孫，
蒼茫歲晚，那有閑愁無數。宵深謾與。怕夢隱春
酣，萬家兒女。不識孤吟，勞人床下苦。

點絳脣

波逐流雲，棹歌裊裊凌波去。數聲和櫓。遠入蒹葭浦。落日中流，幾點閑鷗鷺。低飛處。菰蒲無數。瑟瑟風前語。

蝶戀花

春到臨春花正嫵，遲日闌干，蜂蝶飛無數。誰遣一春拋卻去，馬蹄日日章臺路。幾度尋春春不遇，不見春來，那識春歸處。斜日晚風楊柳渚，馬頭何處無飛絮。

菩薩蠻

西風水上搖征夢，舟輕不礙孤帆重。江闊樹冥冥，荒鷄叫霧醒。舟穿妝閣底，樓上佳人起。驀入欲通辭，數聲柔艫枝。

蝶戀花

落落盤根真得地，澗畔雙松，相背呈奇態。勢欲拚飛終復墜，蒼龍下飲東溪水。溪上平崗千疊翠，萬樹亭亭，爭作擎雲勢。總為自家生意遂，人間愛道為渠媚。

虞美人

杜鵑千里啼春晚，故國春心折。海門空闊月皚皚，依舊素車白馬夜潮來。山川城郭都非故，恩怨須臾誤。人間孤憤最難平，消得幾回潮落又潮生。

鷓鴣天·庚申除夕和吳伯宛舍人

絳蠟紅梅競作花，客中驚又度年華。離離長柄垂天斗，隱隱輕雷隔巷車。斟醪醕，和尖叉。新詞飛寄舍人家。可將平日絲綸手，系取今宵赴壑蛇。

百字令·題孫隘庵《南窗寄傲圖》

楚靈均后數柴桑，第一傷心人物。招屈亭前千古水，流向潯陽百折。夷叔西陵，山陽下國，此恨那堪說。寂寥千載，有人同此伊鬱。堪嘆招隱圖成，赤明龍漢，小劫須臾閱。試與披圖尋甲子，尚記義熙年月。歸鳥心期，孤雲身世，容易成華發。喬松無恙，素心還問霜杰。

霜花腴·用夢窗韻補壽彊邨侍郎

海濶倦客，是赤明延康，舊日衣冠。坡老黎邨，冬郎閩嶠，中年陶寫應難。醉鄉盡寬。更茱萸、黃菊尊前。剩滄江、夢繞觚稜，斗邊槎外恨高寒。回首鳳城花事，便玉河烟柳，總帶栖蟬。寫艷霜邊，疏芳籬下，消磨十樣蠻箋。載將畫船。蕩素波、涼月娟娟。倩酈泉、與駐秋容，重來扶醉看。

清平樂·况夔笙太守索題《香南雅集圖》

蕙蘭同畹，著意風光轉。劫后芳華仍畹轉，得似
鳳城初見。 舊人惟有何戡，玉宸宮調曾諳。
腸斷杜陵詩句，落花時節江南。

长 短 句

少年游

垂楊門外，疏燈影里，上馬帽檐斜。紫陌霜濃，
青松月冷，炬火散林鴉。酒醒起看西窗上，
翠竹影交加。跌宕歌詞，縱橫書卷，不與遣年華。

阮郎歸

美人消息隔重關，川途彎復彎。沉沉空翠厭征鞍，
馬前山復山。濃潑黛，緩拖鬟，當年看復看。
只余眉樣在人間，相逢艱復艱。

虞美人

碧苔深鎖長門路，總為蛾眉誤。自來積毀骨能銷，
何況真紅一點臂砂嬌。妾身但使分明在，肯
把朱顏悔。從今不復夢承恩，且自簪花坐賞鏡中
人。

浣溪沙

六郡良家最少年，戎裝駿馬照山川。閑拋金彈落飛鳶。何處高樓無可醉，誰家紅袖不相憐？人間那信有華顛。

點絳脣

厚地高天，側身頗覺平生左。小齋如舸，自許回旋可。聊復浮生，得此須臾我。乾坤大，霜林獨坐，紅葉紛紛墮。

蝶戀花

滿地霜華濃似雪，人語西風，瘦馬嘶殘月。一曲陽關渾未徹，車聲漸共歌聲咽。換盡天涯芳草色，陌上深深，依舊年時轍。自是浮生無可說，人間第一耽離別。

蝶戀花

斗覺宵來情緒惡，新月生時，黯黯傷離索。此夜清光渾似昨，不辭自下深深幕。何物尊前哀與樂，已墜前歡，無據他年約。幾度燭花開又落，人間須信思量錯。

蝶戀花

百尺朱樓臨大道，樓外輕雷，不間昏和曉。獨倚闌干人窈窕，閑中數盡行人小。一霎車塵生樹杪，陌上樓頭，都向塵中老。薄晚西風吹雨到，明朝又是傷流潦。

蝶戀花

黯淡燈花開又落，此夜雲蹤，知向誰邊著。頻弄玉釵思舊約，知君未忍渾拋卻。妾意苦專君

苦博，君似朝陽，妾似傾陽藿。但與百花相斗作，
君恩妾命原非薄。

浣溪沙

掩卷平生有百端，飽更憂患轉冥頑。偶聽啼鴉怨
春殘。 坐覺無何消白日，更緣隨例弄丹鉛。
閑愁無分况清歡。

清平樂

垂楊深院，院落雙飛燕。翠幕銀燈春不淺，記得
那時初見。 眼波靨暈微流，尊前卻按涼州。
拚取一生腸斷，消他幾度回眸。

浣溪沙

漫作年時別泪看，西窗蠟炬尚泛瀾。不堪重夢十
年間。 斗柄又垂天直北，官書坐會歲將闌。

更無人解憶長安。

謁金門

孤檠側，訴盡十年踪迹。殘夜銀缸無氣力，綠窗寒惻惻。落葉瑤階狼藉，高樹露華凝碧。露點聲疏人語密，舊歡遠處覓。

蘇幕遮

倦憑闌，低擁髻，豐頰秀眉，猶是年時意。昨夜西窗殘夢里，一霎幽歡，不似人間世。恨來遲，防醒易。夢里驚疑，何況醒時際。涼月滿窗人不寐，香印成灰，總作回腸字。

浣溪沙

本事新詞定有無，斜行小草字模糊。燈前腸斷為誰書？隱幾窺君新制作，背燈數妾舊歡娛。

區區情事總難符。

蝶戀花

裊裊鞭絲冲落絮，歸去臨春，試問春何許。小閣重簾天易暮，隔簾陣陣飛紅雨。 刻意傷春誰與訴，悶擁羅衾，動作經旬度。已恨年華留不住，爭知恨里年華去。

蝶戀花

窗外綠陰添幾許，剩有朱櫻，尚系殘紅住。老盡鶯雛無一語，飛來銜得櫻桃去。 坐看畫梁雙燕乳，燕語呢喃，似惜人遲暮。自是思量渠不與，人間總被思量誤。

點絳脣

屏卻相思，近來知道都無益。不成拋擲，夢里終

相覓。 醒后樓臺與夢盡明滅。西窗白。紛紛涼月，一院丁香雪。

清平樂

斜行淡墨，袖得伊書迹。滿紙相思容易說，只愛年年離別。 羅衾獨擁黃昏，春來幾點啼痕。厚薄不關妾命，淺深只問君恩。

浣溪沙

已落芙蓉并葉凋，半枯蕭艾過牆高。日斜孤館易魂銷。 坐覺清秋歸蕩蕩，眼看白日去昭昭。人間爭度漸長宵。

蝶戀花

月到東南秋正半，雙闕中間，浩蕩流銀漢。誰起水精簾下看，風前隱隱聞簫管。 涼露濕衣風

拂面，坐愛清光，分照恩和怨。苑柳宮槐渾一片，
長門西去昭陽殿。

菩薩蠻

回廊小立秋將半，婆娑樹影當階亂。高樹是東家，
月華籠露華。 碧闌干十二，都作回腸字。獨
有倚闌人，斷腸君不知。

关于本书

您现在所阅读的这本电子图书由“抚琴居”制作出品。“抚琴居”是世界名诗欣赏的专门站点，致力于为诗歌读者搜集一份精华文本，为诗歌作者提供一种有益借鉴。

在保证原书内容完整的前提下，您可以对本书进行转载。如果您愿意，我们很乐意您在转载的时候写上我们网站的名字。

本书版权归作者所有，您不能将其用于任何商业用途。如果您需要使用本书中的部分或者全部内容用于某种商业用途，请联系作者，并在征得原作者同意后方可继续您的行为。如果您未征得作者同意而擅自用于某种商业目的，“抚琴居”将不对此负任何责任。

如果您有意出版您的诗歌作品，或者您有制作好的别人的诗集，我们都欢迎您授权我们为您制作或者出版。

如果您阅读本书感到喜爱，建议您购买原版图书以支持您喜爱的作家。

欢迎访问“抚琴居”以获得更多的诗歌信息。

网站地址：<http://fuqinju.126.com>

联系邮箱：fuqinju@263.net